

欽定重修兩浙鹽法志

巡視兩浙鹽課兼杭州織造事務臣延慶疏

奏爲請

旨重修兩浙鹽法志以備考核而昭法守事竊臣仰荷
皇上渥恩簡畀兩浙鹽政之任自到浙以來恪遵

聖訓凡恤商便民有裨鹽務者悉心講求隨時整飭不
敢沿循積習亦不敢輕事更張查得兩浙舊有鹽
法志係雍正六年撫臣李衛兼管鹽政時所修巨
綱細目森立備陳固足以資信守惟是纂成之後
迄今七十餘年今昔情形遞有興革錢糧額引既

增減之不同場竈戶籍亦多寡之互異事緒分歧
條例參錯若不亟爲續修恐蠹吏奸商因經制多
未畫一不免有乘機舞弊情事此鹽法志一書實
關於

國計民生非僅如郡邑諸志徒供考訂之具者比也

臣與撫臣阮元商酌意見相同應請

旨重加蒐輯務俾現行事宜得歸定準不特官吏有所
稽考並可使甲散各商家喻戶曉不致例案混淆
至纂書經費約計需銀五千餘兩爲數無多商人

等均各踴躍情願捐資襄辦現在詳查歷年卷案
凡有關鹽法者逐一細加考核增訂完善一俟釐
辦成書敬繕全帙恭呈

御覽

臣

謹會同撫

臣

阮元恭摺具

奏伏乞

皇上睿鑒謹

奏嘉慶六年五月十三日奏七月初一日奉

硃批依議修纂務期賅備欽此

巡視兩浙鹽政兼管杭州織造事務臣延鹽疏

奏爲遵

旨重輯鹽法志完竣敬謹繕錄進

呈仰祈

睿鑒事竊

臣

於五月間具摺

奏請重修兩浙鹽法志欽奉

硃批依議修纂務期賅備欽此伏思鹽法志自雍正二
年纂輯以後迄今七十餘載其間因革損益隨時
異宜且引地廣袤參錯分歧必須一一蒐考庶齟

屬各員及衆商等有所查核臣謹率同運使等遴
擇紳士設局纂辦敬錄

詔旨冠於卷端其餘分門別目釐訂舊文詳載近制爲
志三十卷復同撫臣阮元恪遵

聖訓悉心復核不敢率略從事茲恭繕裝函其三十有
二冊齎呈

睿覽謹會同撫臣阮元合詞具

奏伏祈

皇上訓示施行謹

奏嘉慶六年十月二十五日奏十二月初三日奉
硃批冊畱覽欽此

纂修職名

總裁

欽命兵部侍郎兼都察院副都御史巡撫浙江等處地方提督軍務兼理糧餉

臣

阮元

欽命巡視兩浙鹽政兼管杭州織造事務

臣延豐

監修

兩浙江南等處都轉鹽運使司鹽運使

臣

張映璣

提調

兩浙杭寧紹溫台鹽運分司運副

臣

郝敏安

運副借補兩浙嘉興松江鹽運分司運判

臣

薛湘

署兩浙杭寧紹溫台鹽運分司運副候補運副

臣

儲夢熊

署浙江金華府糧捕通判兩浙候補鹽運分司運判

臣

呂麟

總纂

原任戶科掌印給事中方略館提調兼總纂官

臣

馮培

原任陝西道監察御史國史館纂修官

臣

潘庭筠

協修

兩浙候補鹽運司經歷

臣

方溥

兩浙鹽運司庫大使

臣

許元仲

浙江湖州府孝豐縣訓導

臣

張迎煦

分輯

原浙江候補同知台州府臨海縣知縣臣華瑞潢

浙江杭州府錢塘縣候選州同知臣項墉

浙江杭州府仁和縣舉人臣胡敬

浙江杭州府拔貢生臣沈士亨

浙江湖州府拔貢生臣邵保初

浙江湖州府烏程縣拔貢生臣張鑑

浙江紹興府餘姚縣副貢生臣邵秉華

浙江杭州府優貢生臣王仁

浙江杭州府仁和縣學生臣趙魏

浙江杭州府學附生臣俞杭

校勘

原江西南昌府同知臣徐聯奎

原太常寺博士舉人臣陸新

江蘇太倉州嘉定縣進士候選知縣臣陳詩庭

原任江蘇清河縣教諭臣談泰

浙江候選教諭舉人臣查枏

浙江候選教諭副貢生臣魏彝憲

浙江鎮海縣訓導臣陳焯

浙江候選訓導廩貢生臣程岷

浙江杭州府錢塘縣舉人臣陳光岳

浙江杭州府拔貢生臣陳鴻壽

浙江嘉興府嘉興縣拔貢生臣李富孫

繪圖

江蘇蘇州府吳縣監生臣周瓚

江蘇蘇州府吳縣監生臣楊昌緒

收掌

兩浙候補鹽運司經歷臣程藍玉

浙江候選訓導廩貢生臣潘學敏

監刻

兩浙鹽運司經歷臣章道基

兩浙杭州批驗所大使臣阮允實

兩浙候補鹽課司大使揀選知縣臣劉魁

叅閱

議敘鹽運使運同臣吳世騶

布政司理問銜加頂戴二級臣俞沛

州同銜加四品頂戴臣姚經

議敘通判加一級臣吳同琯

布政司經歷銜加二級臣汪炯

議敘同知臣顧學汲

州同知銜臣周森

議敘通判加捐鹽運使運同臣楊夢璋

議敘卽用州同知加頂戴一級臣金海

布政司理問銜加頂戴一級臣許成斌

布政司理問加四級臣汪大豐

議敘卽用州判加頂戴一級臣王瑞龍

議敘府通判加一級仁和縣學附貢生臣許漣

馳封廣東肇慶府知府臣王一純

布政司理問銜臣范金然

原任宜昌府知府臣汪思蔚

州同知銜臣吳華金

錢塘縣學生員臣祝德風

議敘提舉司提舉臣潘奕璵

貢生臣朱綺

州同知銜加一級臣顧澐

布政司經歷銜臣孫紹均

候選布政司經歷議敘加頂戴三級臣吳一惠

杭州府學生員臣汪文煥

候選布政司理問臣汪善培

候選布政司理問臣吳峻基

原任刑部主事臣吳廷佩

錢塘縣附監生臣胡儁年

欽定重修兩浙鹽法志

總目

卷首

詔旨

卷一

疆域

行鹽地方 產鹽地方

附

運鹽程途 巡鹽關隘

卷二

圖說

行鹽地方總圖 各場圖 各所圖

附

縣字圖 文瀾閣圖書院圖

卷三

課額一

商課 縣場額 功績 牙稅 包課 雜餉 滴珠 雜徵
引課分徵 縣課分徵

卷四

課額二

場課分徵 牙稅分徵
雜餉分徵

附 解支款目

卷五

引目

正引 票引 正票引派額
正票引分銷 餘引

附 請領引目 給派引目 繳銷引目
引票分銷

卷六

場竈一

各場分款 膏聚團額 現煎團額 鍋盤 煎辦 鹽斤 色味
倉款 場地 竈丁

卷七

場竈二

同前

卷八

帑地

帑鹽緣起 帑鹽本義 帑鹽例案 附 免費地方

卷九

掣驗

季掣 捆運 出場 到所 附 例限

卷十

奏議一

卷十一

奏議二

卷十二

奏議三

卷十三

律例一

大清律例
現行則例上

卷十四

律例二

現行則例下

卷十五

條約一

卷十六

條約二

卷十七

成式

引式 票式 水程式 單式 由單式 串式 帖式 牌式 契尾式
簿式 實收式

卷十八

優恤

簡恤 實養

卷十九

沿革一

卷二十

沿革二

卷二十一

職官一

職官表 官紀上

卷二十二

職官二

官紀下

卷二十三

職官三

官職附 幕役食

卷二十四

商籍一

科目 貢選

卷二十五

商籍二

人物

卷二十六

商籍三
列女

卷二十七

藝文一
制表書疏上

卷二十八

藝文二
薛狀子議揭序引跋考說

卷二十九

藝文三
頌記上

卷三十

藝文四
記下七詩

凡例

一兩浙離志自前明嘉靖時御史劉仕賢創始其後
重修於參議王圻而閱歲已久散軼無存迨雍正
二年撫臣李衛奉

命纂輯分門比類條例井然足彰

熙朝之隆軌矣顧書成至今已七十餘載因革損益隨
時制宜有難泥於膠柱刻舟之見者茲蒙

皇上俞允增修爰敬謹編次闕漏者補之更正者釐之
續之期勉副

聖主眩備之

明訓云

一國家典章首重詔令我

朝治臻極盛

聖

聖相承一切裕民足國之謨綱舉目張悉繇

睿斷卽鹺政一事而經法之昭垂

恩膏之徧浹實爲曠古所罕有茲恭繕

詔旨冠於卷首俾仰

絲綸者識所遵循永爲萬世軌則

一舊志分十六門各系細目於其下今仍分門十六
惟戶口并入場竈而別立帑地門其各門提綱小
序則視原書較爲詳晰

一浙省鹽筴被及兩江境壤旣廣經界綦嚴不獨產
鹽行鹽各分畛域而程途關隘均有釐定成規不
容踰紊至緝私最爲要務司事者所宜究心胥以
疆域統舉之其山川古蹟可供攷證者以非鹽法
所重祇於圖說中附見一二

一場竈之區自宋元明以來有沿有汰有并有析葢
海沙之坍漲靡常斥鹵之衰旺時異場旣改易而
亭戶團舍亦隨之變遷繪圖系說始能瞭如指掌
也至

文瀾建開蒼稗羣書人思企躍而官廨爲莅事之所
書院有養士之資故諸圖亦綴以說

一鹽課自歲輸正賦及各屬分徵之外名目紛繁又
今昔情形隨時遞易而贏縮增減要歸定額故課
額爲握筭之總匯也有入有出而會計胥協焉是

以解支款案附載其後

一鹽以引爲符信蓋導之使流也有正引有票引又有餘引額隨地定而掣銷之責成重矣故條列其目

一杜私販者莫先乎場竈所以清其滲漏之源也舊志有戶口一門分載食鹽煎鹽人口第編戶版籍歲由里吏達諸

天府生齒日增難以輯爲定數茲祇將煎鹽丁戶附入場竈之末以備稽考

一帑鹽之設起於雍正五六年間故舊志未及載蓋發官帑以收餘鹽而仍資商運則姦販自消今增立帑地一門而商人之借領帑項以資營運者亦類附焉

一舊志特詳掣摯者鹽法之權衡也言掣而摯在其中若鹽之出場抵所到縣節次俱有盤驗並昭例限之嚴因連及之而改曰掣驗

一臣工敷奏業經奉

旨允行者已分別臚載各門然或摘敘大略或無可附

麗尙多闕遺取其有關政要者列爲奏議三卷如
詞義過冗稍加芟節

一律例約束人心故詳載焉以昭憲典能知恪守自
無作姦犯科之患矣其或下里顓蒙未諳三尺則
有申明禁令俾家喻而戶曉者擇其窾要別爲條
約門

一法必有式而後胥吏商民無所容其姦僞所謂一
成不可變也成式定則成就繩墨件繫條分登載
不嫌瑣細

一我

國家保惠商民多方

軫恤下逮海濱窮竈無弗感沐

皇仁其商人有向義急公者悉蒙

甄敘賞賚典至優焉因彙載爲優恤門

一歷代沿革事宜各有利病而釐法尤變更不一其

載在史書者得失粲然可備考覈且以見

聖朝規制精詳超軼曩代也

一鹽官建置歷代各殊舊志仿史漢例作職官表於

本朝官制加詳茲仍其舊而訂補之其莅官政績有裨鹽法者亦循舊例詳慎登載如無政事表見則祇紀姓名爵里至官俸役食例得附書因綴於職官之末

一兩浙商籍自我

朝廣額振興人才輩出紀科目而並及貢選以見英俊升階拔茅連茹正未有艾其由竈籍進者例散入民卷不另編號設額故不備列至商籍雖異土著而久居浙地其有潛德懿行忠孝貞節之事未

可使湮沒不彰今照舊志增輯以備惇史訪採

一鹽法重在經制不尚文詞與郡國山川諸志體例
差別本無須藝文爲也然事業掌故亦有藉文章
而顯者茲仍輯藝文一門義存質實無取浮華詩
專採有關鹽政利病者數篇至贈答之什概不錄
焉

謹按是志於嘉慶六年十月恭摺進

呈七年正月遵奉

諭旨改定數條覆加詳勘卽付刊刻至八月刊竣復同

原

進繕本一并呈

覽所有志內額徵數目及經理各事宜俱以嘉慶六年
進書時爲斷其在成書之後者概不增易以期截然
畫一免致參差

欽定重修兩浙鹽法志

卷首

詔旨一

巡視兩浙鹽政兼管杭州織造事務臣延豐奏錄

世祖章皇帝

順治四年二月十二日欽奉

恩詔內開

一浙閩運司鹽課前代天啟崇禎年間加派名色甚多
深爲商厲今著盡行蠲免止按萬歷年間舊額按引

徵課

順治四年六月十七日戶部奉

上諭興販私鹽屢經禁約近聞各處姦民指稱投充滿洲
率領東兵車載驢馱公然開店發賣以致官鹽壅滯殊
可痛恨爾部卽出示再行嚴禁有仍前私販者被獲撻
八十鞭其鹽斤銀錢牲口車輛等物俱入官巡緝員役
縱容不行拏緝者事發一體治罪特諭欽此

順治五年六月十六日戶部奉

上諭前因地方姦民架引滿兵興販私鹽已傳諭爾部行

文嚴禁犯者捉獲到官滿兵撻八十鞭鹽斤牛驢車輛
銀錢等物盡行入官近聞近京地方土棍串通滿兵車
牛成羣攜帶弓矢公然販賣私鹽以致官鹽壅滯殊可
痛恨除已傳諭各回山牛最嚴行禁止外爾部卽刊刻
告示再加申飭如有仍前違旨販賣私鹽者不論滿漢
許地方巡緝員役擒拏解部依律治罪鹽斤等項入官
爾部仍差人密訪如地方官員并巡鹽人役容隱不舉
事發一體連坐特諭欽此

順治八年三月初八日奉

上諭朕於本月初六日親覽巡鹽御史崔允宏章奏因思及各處報鹽課中常報有餘銀若干細思鹽課正額此自應徵解若課外餘銀非多取諸商則侵剋於民大屬弊政傳戶部都察院通行各鹽差御史及各鹽運司止許徵解額課不許分外勒索餘銀如有貪縱御史及運司各官許商民指實赴部院首告審問確實奏聞治罪用布朝廷恤商裕民之意該部院各刊刻告示通發京城內外及各督撫按徧傳內外道府州縣鹽運等司著實遵行特諭欽此

順治十二年正月二十七日

上諭河東長蘆等處各運司鹽課原應商人辦納中有每年派民納課而民不見升合之鹽者著該運司詳加稽核從長計議務令公私兩便經久可行毋得因循積弊特諭欽此

順治十二年十一月二十九日

上諭吏部都察院國家設立巡方御史原爲察吏安民之本首在懲貪必按臣先能以廉持已奉公守法然後有司有所畏憚不敢貪婪害民近初遣顧仁等巡方時曾

召至太和殿面諭巡按已經止息因此官關係甚重吏治貪廉民生利病皆由此上達故復遣爾等往巡直省地方朕卽倚爲耳目手足爾等當體朕意潔已率屬冀安民生若不法受賄負朕委任不拘常律但得銀一兩一錢定行處死又召至左翼門再加申諭往聞巡按官初至地方亦能虛博廉名及至差滿回日多婪取贓物爾等若蹈此弊初至廉名俱置不問必照貪例處分朕屬望如此殷切戒諭如此嚴明卽當洗滌肺腸痛除積弊乃顧仁輒敢背旨壞法收蠹納賄朕親行審鞠情真

罪著已經正法訖合通行天下嚴加禁飭以後各巡方御史及巡鹽巡漕巡倉巡視茶馬各御史但有這等違法受賄犯贓卽行處斬定不寬宥爾等卽行傳知特諭
欽此

聖祖仁皇帝

順治十八年十二月二十五日

上諭戶部鹽課錢糧關係軍國急需聞內外大小官員勢豪之家多有貿易販鹽倚勢不納課銀巡視鹽課官員不畏勢力不徇情面盡心催徵者卽能多得課銀其畏

勢徇情者卽致課銀虧欠以後管鹽各官多得課銀者著以稱職從優議敘額課不足虧欠者以溺職從重治罪其官員貿易倚勢漏課情弊該管官須嚴加稽察叅奏本主一并從重治罪巡鹽等官如仍前徇隱定行一并從重治罪不饒爾部卽遵諭行特諭欽此

康熙四年三月初五日欽奉

恩詔內開

一直省順治十六十七十八年催徵不得各項舊欠錢糧著照蠲免十五年以前錢糧一體蠲免前侵盜庫

閏月停其增收

康熙二十四年四月二十七日奉

旨盜販私鹽屢經嚴禁未見杜絕皆因地方經管各官不實心奉行以致仍多私販著九卿詹事科道會同確議具奏欽此

康熙三十三年十二月二十日戶部等題爲請

旨事會議得各關鹽差每年額徵稅課外餘剩數目酌量加增作爲正數以充兵餉等因二十一日奉

旨依議這加增銀兩俱出於該差官員所私得贏餘之數

不得借端於定額外多徵貽累商民欽此

康熙三十八年三月初四日奉

上諭直隸廣平府知府石佳彝年久操守好用度簡省著
補兩淮鹽運使於正項錢糧之外伊每年應得者儘足
伊用度存留餘俱解送河工兩浙長蘆兩廣河東福建
此五處運使等亦照此俱解送河工將伊應得之分若
不掣出亂派商人從重治罪特諭欽此

嗣後於每年運
司節省項下撥

解河餉銀
一萬兩

康熙三十八年四月初二日

上諭戶禮二部朕子育黎元勤求治理日孜孜以施德澤厚民生爲急務而江浙二省尤東南要地朕時切軫念比歲以來蠲豁田賦賑濟凶荒有請必行無災不恤雖漕項錢糧向未蠲免者亦曾經特旨蠲免愛養之道備極周詳庶幾民生日益康阜用是乘輿時邁於視河事竣巡歷江浙諮訪民間情形見淮揚一路旣困潦災而他所過州縣察其耕穫之盈虛市廛之贏絀視十年以前實爲不及此皆由地方有司奉行不善不能使實惠及民所以小民雖懷愛感之誠而朝廷恩澤卒不下究

朕目擊塵懷亟思拯恤截畱漕糧寬免積欠已另有諭旨惟各鹽差關差向因軍需浩繁於正額外令在差官員以所私得贏餘交納充用今思各官孰肯自損私橐勢必仍行苛取商瘠民困均坐此弊著將加增銀兩一概停罷以紓商民之累其兩淮鹽課康熙十六年曾加增四十萬兩今恐商人辦課維艱漸至匱乏著減去二十萬兩此外有應行應革事宜朕還都以後仍加商確次第舉行該督撫藩臬皆地方大吏亦著悉心體訪凡有可爲民興利除弊者作速勘實陳奏嚴革雜派禁止

刁訟然後胥吏不能作姦良民得以安業倘官吏有悖
旨妄行者許商民首告該督撫察出卽行叅奏朕視民
如傷惟恐一夫不獲其所茲值海宇昇平兵革不事正
當與民休息之時故特渙沛德音減徵寬稅以爲閭閻
閒有餘之力萬一嗣後別有急需或不得已而稍議加
增想在小民亦能共諒朕懷輸將之恐後也至於江南
浙江人文稱盛入學名數前已酌定增額今著於府學
大學中學小學各增五名舉行一次以示獎勵人才至
意爾二部卽遵諭行特諭欽此

康熙四十四年五月初十日奉

上諭今看得私鑄小錢販賣私鹽者甚多如何嚴行禁止之處著戶部定例具奏欽此戶部議覆奉

旨九卿詹事科道會議具奏欽此經九卿等議覆六月二十一日奉

旨舊鑄錢展限之事著另議具奏其私鑄錢之人并販賣私鹽者斷不可寬免此事進京之日著大學士等九卿大人會同議奏欽此

康熙四十六年十二月初九日

上諭刑部漕船往來河道運丁人等夾帶私錢私鹽並裝載一切貨物遇有稽察員役動輒抗拒傷人放火誣賴沿途商民船隻悉被欺凌種種不法之事甚多朕所深悉漕運總督倘不嚴察懲處則運丁恣意橫行必致重爲民害這案著該督再行確審定擬以爲悍丁生事病民者之戒特諭欽此

康熙五十三年三月十六日治儀正傻子員外郎
雙全將浙江行鹽商人汪宏茂等恭進

萬壽龍衣一襲彩緞四十端貢銀二萬兩黃摺交與該班

學士巴格傳

旨這摺子交與該部議奏欽此戶部議得應將商人等所進衣緞行文內務府照數查收其伊等貢銀應行令兩浙巡鹽御史委員解交廣善庫等因本月二十三日摺奏本日奉

旨衆人進貢物件俱不曾收伊等進貢物件不必收他著發還銀兩補還伊等現欠銀兩於伊等亦有裨益欽此康熙六十年十二月初十日大學士馬齊戶部尚書孫奎齊等奉

上諭聞得江浙私鹽甚行盡爲盜賊地方官員明知並不查拏應著江南浙江京口將軍等派出官兵嚴行查拏俟回鑾日孫查齊爾同九卿詹事科道會議具奏特諭
欽此

世宗憲皇帝

雍正元年正月初一日

上諭各省道員爾等官歷僉司所以贊襄藩臬承流宣化者也分守分巡職居協理糧河鹽驛各有專司身居是官必顧名思義名者實之華也克副其實而後名歸焉

如守巡兩道首當潔已惠民凡府州縣之廉潔貪污俱
宜細加察訪不時密詳督撫以憑舉劾地方有土豪武
斷尤宜禁戢翦除衛良鋤莠乃稱其實若但知趨承大
吏或祇圖下屬陋規一切吏治民生概置不問貪庸陋
劣殊負朝廷設官之意矣糧道專理漕運職任匪輕使
徒知起運規例扣剋運費苦累運丁營私煩擾有玷官
箴貽害百姓何所底止河道有董率工程之責凡分修
河員孰賢孰否俱應洞悉並宜親身經歷查勘估計某
口險峻某口平易某處隄工堅固某處冒支帑金倘不

計虛實不辨勤惰僅以納賄多者爲能員餽遺少者爲拙吏而於工程漠不經意一遇坍塌誰之咎耶鹽道一官尤關國課邇年鹽法弊竇叢生正項錢糧每多虧欠一由上下各官需索商人巧立名色誅求無已窮商力竭不得不那新補舊上虧國課高擡鹽價下累小民至於官鹽騰貴貧民販賣私鹽捕役鬪毆株連人民流弊無窮一由商人用度奢靡相仍陋俗不知節儉致欠課徵爾等運籌鹽法宜將陋例積習盡情禁革必思何以蘇商何以裕課上供軍國下利閭閻方爲稱職驛道爲

驛站錢糧所係必廉潔自守乃可剔弊釐姦凡驛遞馬匹數目多寡每有假冒開銷歲修船隻亦有虛浮不實該員一貪貲貨勢必昏庸或過於苛覈勒索多方經管屬吏疲不能支總之病官病民悉緣貪黷敬爾有官垂諸古訓靖其爾位載在風詩爾等各有所職各守官方名實二字極宜體認今以獻賂爲實虛譽爲名動云名實兼收內以欺已外以負國有覲面目其何以立身而抒忠盡乎

皇考御極六十餘年以軫恤民生爲首務各省道員必親

加遴擢諄諄戒勉極其詳慎朕纘承大統翼翼小心惟
仰體

皇考愛養元元至意亦期爾等爭自濯磨振飭風憲以副
朕望果能肅清綱紀無致廢弛朕當破格獎勵其或因
循不改朕必置之重法特諭欽此

雍正元年八月初二日

上諭各省鹽院國家欲安黎庶莫先於厚風俗厚風俗莫
要於崇節儉周禮一書上下有等財用有度所以防僭
越禁驕奢也孟子亦曰食時用禮菽粟足而民無不仁

朕臨御以來躬行節儉欲使海內之民皆敦本尚實庶
康阜登而風俗醇夫節儉之風貴行於閭里而奢靡之
習莫甚於商人朕聞各省鹽商內實空虛而外事奢侈
衣服屋宇窮極華靡飲食器具備求工巧俳優伎樂恒
舞酣歌宴會嬉遊殆無虛日金錢珠貝視爲泥沙甚至
悍僕豪奴服食起居同於仕宦越禮犯分罔知自檢驕
奢淫佚相習成風各處鹽商皆然而淮揚爲尤甚使愚
民尤而效之其弊可勝言哉爾等旣司鹽政宜約束商
人嚴行禁止出示曉諭諄切勸戒使其痛自改悔庶循

禮安分不致蹈僭越之愆而省一日之糜費卽可以裕
數日之國課且使小民皆知警惕敦尚儉約使民生亦
有裨益庶不負朕維風振俗之意若仍前奢侈不知悛
改或經朕訪聞或被督撫叅劾商人必從重究治爾等
亦不能辭徇縱之咎特諭欽此

雍正二年二月初二日

上諭各省關差鹽差從來關榷鹽稅之設所以通商裕國
或用欽差專轄或令督撫兼理無非因地制宜利商便
民之至意也朕前於關鹽兩差各下諭旨誥誡諄切但

旗員向來相沿成習陽奉陰違任意侈靡不知撙節額外加派苦累商民差滿之日惟恐回京有當差効力之事每以闕額懇求寬限希圖掩飾是以不憚叮嚀再加申飭大抵關差之弊皆未講日計不足月計有餘之長策惟知目前小利恣意侵漁聽信家丁縱容胥吏開關分別遲早肆無厭之誅求報單任意重輕爲納課之多寡飽谿壑者則任其漏稅代爲朦朧不遂欲者則倒篋傾箱一物不免致商賈畏懼裹足不前行旅徬徨越關迂道則困商實所以自困也鹽差之弊尤合重懲飛渡

重照貴賈夾帶弊之在商者猶小加派陋規弊之在官者更大若不徹底澄清勢必至商人失業國帑常虧夫以一引之課漸添至數倍有餘官無論大小職無論文武皆視爲利藪照引分肥商家安得而不重困賠累日深則配引日少配引日少則官鹽不得不貴而私鹽得以橫行故逐年之課難以奏銷連歲之引盡皆壅滯非加派之所致歟故關差惟在嚴禁苛求使舟車絡繹貨物流通則稅自足額鹽差惟在力除加派使商困少蘇盡復舊業則課自贏餘至於督撫係封疆大吏更當仰

體朝廷歸并之意關政不得視爲帶理漫不經心誤任屬員聽其剝削鹽政不得因恤窮商獨專厚利硬派州縣計口徵錢夫權關部屬尚有顧忌恐督撫持其短長今歸督撫則何所瞻顧巡鹽御史地方官或不奉約束今歸督撫則孰敢抗違況欽差猶每年更換而督撫兼理則無限期若不實心奉行使風清弊絕則大負歸并之本意矣至將耗羨充課固屬急公但恐以耗羨歸正額而正額之外復加耗羨商民重輸疊出何以堪此朕深悉關鹽擾累之害垂念商民營逐之苦特諭爾等經

理權稅者務期奉公守法遴委得人知商旅之艱辛絕
箕斂之弊竇通商卽所以理財足民卽所以裕國如自
利自便罔上行私責有攸歸其悉遵朕旨特諭欽此

雍正二年五月十六日

上諭浙江巡撫黃叔琳聞浙江沿海一帶窮民多赴場竈
販鹽餉口今值雨水調勻農夫力作之候爾須乘此時
諭令歸農民始得所其有不能歸農者可會同噶爾泰
酌議或暫令其卽於場竈納課以開資生之路或以庫
銀買竈戶餘鹽以杜私販之門從前地方官員以鹽務

爲無預已事任其破壞甚非和衷其濟之義爾當與鹽院協同商議實心辦理務期鹽政無虧方爲有益嗣後凡有關於鹽政無礙於地方可以變通之處勿拘成例卽行奏聞特諭欽此

雍正二年八月二十日奉

上諭覽噶爾泰摺奏現今海潮漫大鹽厥漂沒頗多沿海州縣田產民人大受其患等語著石文焯馳驛速往浙省署理巡撫印務石文焯到時將被災人民作何撫字作何賑濟之處一面料理一面奏聞該部速行特諭欽

此

雍正三年五月十七日

上諭戶部去歲江浙海潮衝溢沿海場竈淹沒之處甚多
兩淮鹽政所屬地方經噶爾泰奏聞朕卽發帑賑恤并
將雍正元年二年竈戶未完折價銀四萬餘兩悉行蠲
免其兩浙鹽政所屬地方該巡鹽並未將被災之處題
報今謝賜履以摺奏聞去秋海濤漂決情形兩浙與兩
淮無異朕博施一體之心務使率土均霑膏澤著將華
亭婁縣上海海鹽餘姚蕭山慈谿等縣雍正元年二年

未完場課銀兩悉行蠲免該鹽政通行曉諭俾各場丁戶人人得霑實惠將已未完場課數目確查報部倘有不肖有司將已完作欠或借端朦混私行重徵者卽指名題叅若隱匿通同後經察出將該鹽政一并從重治罪該地方督撫仍嚴加稽察毋使吏胥中飽以副朕勤恤窮丁普濟同仁至意爾部卽遵諭行特諭欽此

雍正四年五月浙江巡撫兼理鹽務臣李衛條奏爲請廣文武分任緝盜之法以盡職守以杜推諉事部議以毋庸議題覆八月二十四日奉

旨這事情部議乃是守經李衛所請乃是行權李衛實心辦理地方事務自因本地情形故行條奏且浙江素多私鹽理應嚴加緝捕著照李衛所請於浙江一省試行一二年再看欽此

雍正四年十月初六日浙江巡撫兼理鹽務李衛奏商人汪中立等公輸銀十萬兩以備積貯奉

旨據李衛奏稱兩浙衆商公輸銀兩爲地方預備積貯甚屬可嘉著議政大臣大學士九卿悉照兩淮鹽義倉之例定議具奏欽此

雍正四年十月初十日

上諭戶部去年莽鵠立奏稱竈地久未清查以致民竈爭
控不已請將竈戶灘地從前售與民人者許其回贖如
無力者仍許現在耕種之民收租納糧俟原業竈戶有
力之日再行回贖等語經九卿議覆准行近聞當年竈
地轉售與民其年分久遠有百餘年者業主售主多半
變更卽有子孫當時價值多寡亦俱遺失或有逃亡等
戶更無從質問以致同姓影響之人彼此爭贖紛紛告
訐實滋煩擾若必俟原業竈戶有力之日回贖倘原業

之戶始終無力則此項地畝久久竟成民地亦非清查
竈地之良法朕意以爲不若將竈戶賣與民人之地交
易年近確有實據者令竈戶備價取贖其餘年久被失
之地所有爭告無憑詞告該衙門俱行註銷凡民人所
有竈地嗣後止許賣與竈戶永遠爲業如有仍轉行典
賣與民者照盜賣官地律治罪永以爲例如此則數年
之後竈地自漸歸於竈戶而無不清之弊矣爾部著卽
行文著山東巡撫長蘆巡鹽御史遵照實心奉行特諭

欽此

雍正四年十月二十一日

上諭各直省督撫從前戶部春秋二撥歲底大撥之時各省俱有講求冀免撥解京餉以致藩庫錢糧虛收捏報掩飾彌縫之弊不一而足自怡親王總理戶部以來凡事秉公持正於撥餉一項皆斟酌地方遠近詳核錢糧多寡皆據實預先奏朕定奪後方行分撥四年以來毫無假借各省亦應曉然明白矣乃聞向有愚昧之人私囑吏役暗行賄賂以冀免撥其巧爲遷避者將實存數目不盡開報蓋緣各省督撫身處遠方不能深悉戶部

撥餉悉出至公乃爲吏胥之所愚弄耳茲特曉諭各該
督撫嗣後春秋二季報冊務將藩庫所有實存銀兩悉
行開報應存應解靜候部撥並令督撫等咸知吏胥斷
不能玩法增減切勿爲人所愚行賄請託朕旣經曉諭
之後倘有再犯者一經發覺將與受俱按律治罪決不
寬恕特諭欽此

雍正五年正月二十日大學士富寧安等奏議給
奉天寧古塔黑龍江三處將軍養廉銀兩奉

旨爾等議稱不便給與參票等語所議甚是此等養廉之

項應動用贏餘銀兩著將長蘆鹽課贏餘銀兩內動用
六千兩給與三處將軍分用朕思在京城旗下大人及
有執掌之官員亦當酌與養廉之資著將兩浙鹽課贏
餘銀兩動用一萬兩給與兩翼前鋒統領護軍統領前
鋒叅領護軍叅領前鋒護衛等官分用再將兩淮鹽課
贏餘銀兩動用二萬四千兩給與八旗都統以下叅領
等官分用欽此

今於運庫盈餘項下
照數起解戶部轉給

雍正五年十二月十九日戶部議覆浙江總督兼
理鹽務李衛題請將兩浙甲商浮用銀兩准各商

按引公輸隨課上納奉

旨依議兩浙鹽商急公効力甚屬可嘉著議敘具奏欽此
雍正六年七月二十一日奉

旨大使管理鹽務關係錢糧若職任卑微不足以彈壓商
竈其應揀用何項人員及量加品級之處該部定議欽
此

雍正七年八月十七日奉

上諭兩浙私鹽向來充斥前經督臣李衛竭力清釐多方
整飭是以巨窩斂迹梟販潛蹤官引疏通弊端禁止近

聞江南地方文武官員視爲膜外奉行不力以致蘇松一帶人心懈弛濱海鹽徒遂借肩挑背負四十斤以內不在禁約之例于是號召老少男婦百十成羣公然交易因而運送窩固無從究詰夫肩挑背負四十斤以內不在禁約之條者乃國家恩恤小民之至意若因此而廣開鹽梟私販之門是朝廷之恩例轉令不法棍徒藉以長姦而滋弊矣聞李衛先經行令每縣查報貧難小民四五十名給與木籌每日許赴官店買鹽二十斤挑賣以爲餬口之計此法甚善窮民旣得覓利以資生肩

販不致營私而虧課於鹺政有益而江南督撫身任地方同有稽查經理之責豈無耳目心思乎今蘇松一帶私販仍復橫行江南督撫有司亦自知愧赧否特諭欽此

雍正八年十一月奉

上諭朕卽位之初清查戶部錢糧始知歷年以來虧空竟至二百五十餘萬之多是時怡賢親王管理部務奏稱虧空歷年已久若一一根究責令賠補則獲罪之人甚衆懇請寬免查究嗣後以本部餘平銀兩陸續代爲完

補等語朕以歷年該管之堂官庫員職司出納而虧空
至於如此若不責令賠補則國法何在而作弊之人亦
無以示懲因令孫查齊秉公開報著追計其開出之數
原不及虧空之半其餘則仍係怡賢親王經理代爲完
補也迨至上年計算孫查齊所開之數完納者甚少而
拖欠者仍多朕思怡賢親王仁厚居心曾有代完之語
今成其善念將應追之項悉予豁免准以戶部平餘銀
兩代爲完項此戶部彌補虧空之始末也數年以來該
部既有補帑之事是以各省解銀交庫之時平銀未免

稍重但從前解京銀兩到部交納時雜費繁多又有暗中包攬官吏勒索種種情弊此中外所共知者自怡賢親王管理三庫以來弊絕風清各色浮費悉行禁革雖餘平銀兩略略加添而較之從前雜費則減省已多且怡賢親王之意原欲俟虧空彌補全完之日仍將平銀裁減此亦王屢次陳奏於朕前者今庫中虧空之項俱已補足著將辛亥年春撥解部銀兩照從前餘平之數減去一半該部卽行文各省巡撫布政使知之此項銀兩大約出自耗羨項下嗣後著畱於本省以備地方公

事之用若司庫官員有額外多索者著管理三庫之王大臣查叅若外省官員因此次恩旨將解部之項或有剋扣短少等弊亦著王大臣指叅從重議處特諭欽此

雍正十年九月初八日奉

上諭今年江浙地方海潮驟長沿海民居被水衝溢朕已勅令該督撫等加意撫綏毋使窮民失所近聞南匯縣下砂頭二三場等處竈戶鹽丁被水者甚衆該場官請將商捐鹽義倉及嘉興存貯米石動支賑恤各商亦環請願將捐米賑救而署督李燦鹽道江承玠彼此遲延

觀望二十餘日僅兩次發銀四百兩聊以塞責等語李
燦總理鹺政江承玠乃專司鹽務之大員今當竈戶鹽
丁被水之時不將商捐備用之倉穀速行賑濟以致窮
丁嗷嗷待哺流離失業是誠何心著傳旨嚴行申飭迅
速料理俾獲寧居倘程元章已到新任卽交與程元章
督率江承玠盡心辦理欽此

雍正十一年正月初八日奉

上諭上年江南沿海被水地方如常熟等二十二州縣並
續報之華亭等六縣該督撫等已遵旨撫綏軫恤定議

大賑三次每次以一月爲期料寒冬初春以來窮民存養有資不致失所矣朕念二三月間正青黃不接之時尚需籌畫接濟資其力作庶可無誤春耕著再加賑四十日以昭格外之恩其有從前遺漏貧民並先可餬口而目下力不能支者亦著查明添入補賑之內再被水之鹽場竈戶亦照貧民例加賑一月欽此

雍正十一年八月初一日奉

上諭上年江南松江地方潮水泛溢爲災聞附近各鹽場內惟南匯縣之下砂各場奉賢縣之青村場被災稍重

竈丁未免艱窘朕心深爲軫念查下砂頭場二三場及青村場有本年額課銀兩又有歷年舊欠銀兩若令此時照例徵收竈丁難於輸納著將本年額課緩至十月秋收後開徵其歷年舊欠之項分作三年帶徵以紓竈力可卽傳諭浙江總督程元章知之欽此

雍正十一年十二月初七日奉

旨從前各官所得兩浙鹽規程費銀兩原出商人等餽送自應向各該員名下著追今各員不行完繳自有應得之罪乃仍令各商代爲完納是商人等既勒索餽送於

前復著落代賠於後而收受各員轉得脫然事外於情理均未允協其應追銀兩不必令商人等十年帶完著仍向各該員名下勒限著追欽此

雍正十二年八月十四日工部議覆浙江總督程元章疏稱商人汪恆豐等捐輸銀十萬兩撥濟海塘公用應准其捐輸奉

旨依議捐助塘工之汪恆豐等著交該部分別議敘具奏
欽此

雍正十三年七月奉

上諭浙江鹽務漸不如前若不畱心整頓必致廢弛難理
程元章力量僅能勉強辦理巡撫事務不能兼理鹽政
浙江布政使張若震年力精壯實心任事從前在鹽道
任內曾經諳練其辦理亦屬妥協著伊兼管鹽政凡地
方文武官弁有闕涉鹽務者准其舉劾若有作弊掣肘
者卽著糾參欽此

欽定重修兩浙鹽法志卷首

欽定重修兩浙鹽法志

卷首

詔旨二

巡視兩浙鹽政兼管杭州織造事務臣延豐恭錄

高宗純皇帝

雍正十三年十二月初八日奉

上諭朕前降旨該部令傳諭江南督臣將雍正十二年以前兩淮場課舊欠查明奏聞蠲免今朕聞兩浙山東福建廣東諸處各有舊欠場課鹽折銀兩事同一體宜並

施恩著該部傳諭各該督撫查明奏聞一并豁免欽此
乾隆元年正月二十日奉

上諭私鹽之禁所以除蠹課害民之弊大夥私梟每爲強盜逋藪務宜嚴加緝究然恐其展轉株連故律載私鹽事發止理人鹽並獲其餘獲人不獲鹽獲鹽不獲人者概勿追坐至失業窮黎肩挑背負易米度日不上四十斤者本不在查禁之內蓋國家於裕商足課之中而卽以寓除姦愛民之道德意如是其周也乃近見地方官辦理私鹽案件每不問人鹽曾否並獲亦不問販鹽斤

數多寡一經捕役汛兵指挈輒根追嚴究以致挾怨誣
攀畏刑逼認干累多人至於官捕業已繁多而商人又
添私雇之鹽捕水路又添巡鹽之船隻州縣毗連之界
四路密布此種無賴之徒藐法生事何所不爲凡遇姦
商夾帶大梟私販公然受賄縱放而窮民擔負無幾輒
行拘執或鄉民市買食鹽一二十斤者並以售私挈獲
有司卽具文通詳照擬杖徒又因此互相攀染牽連貽
害此弊直省皆然而江浙尤甚朕深爲憫惻著浙省督
撫嚴飭各府州縣文武官弁督率差捕實挈姦商大梟

勿令疏縱其有愚民販私四十斤以上被獲者照例速結不得拖累平人至貧窮老少男婦挑負四十斤以下者概不許禁捕所有商人私雇鹽捕及巡鹽船隻幫捕汛兵俱嚴挈停止毋得滋擾地方俾良善窮民得以安堵欽此

乾隆元年八月二十四日奉

上諭浙江濱海地皆斥鹵向來鹽價甚賤居民稱便十餘年來鹽價增長近則加至二三倍不等夫以小民日用必須之物而昂貴若此朕心深以爲憂卽中外之人亦

無不知兩浙鹽貴之爲累者朕屢次切諭大學士嵇曾筠令其悉心經理乃數月以來雖據奏報鹽價漸平然較之十數年前仍屬昂貴朕再四圖維並畱心諮訪鹽價之貴固在於場鹽少產亦由於商本艱難惟有使商人鹽斤充裕則鹽價自然平減今酌定增斤改引之法將杭嘉紹三所引鹽循照兩淮舊額每引加增鹽五十斤連包索共重三百三十五斤至松江一所原屬濱海產鹽之區向因額課季引九萬餘道分別上中下三則徵收正課公費銀五萬四千餘兩遂使近場州縣多有

鹽貴之苦今循照沿海溫台等處之例改行票引九萬餘道每引給鹽四百斤令商人設店住賣如此增斤改引一爲變通則商本寬裕轉輸便易商人不受減價之累百姓多受減價之益大學士嵇曾筠再爲多方調劑加意體恤庶可復還十數年前之原價以便民用著該部行文大學士嵇曾筠遵照諭旨辦理特諭欽此

乾隆三年正月初八日奉

上諭昔年各省解京餉銀有隨平陋規一項雍正元年蒙皇考諭令停止嗣因清查部庫約計虧空銀二百五十餘

萬兩事歷多年難於究問經怡賢親王以各色浮費既已禁革奏請將京餉平餘陸續彌補以重國帑每餉銀一千兩收平餘二十五兩較之從前陋規雜費減省已多至雍正八年虧空補足欽奉

皇考諭旨嗣後解部平餘銀兩著照從前之數減去一半此項原出於錢糧耗羨卽畱於本省以備地方公事之用欽遵在案是以年來解部之平餘已較原數裁減一半矣朕思平餘卽係耗羨並非別有加徵解交部庫與存貯藩庫均爲國家公事之需但目前尚有平餘解部

之名恐外省官吏或有借端需索者亦未可定從乾隆三年爲始將減半平餘銀兩一概停其解部卽存貯本省司庫遇有地方荒歉及裨益民生之要務確應賑恤辦理者卽將此項奏明動用報部查核此項旣出民力輸將仍令一絲一粟均濟百姓之緩急朕何取焉若該省大小官員有奉行不善使百姓不沾實惠者朕惟於該督撫是問欽此

乾隆四年正月初五日奉

上諭上年江南地方收成歉薄民食維艱朕宵旰焦勞多

方籌畫惟恐一夫不獲其所其賑濟之例據部臣與該督撫定議極貧之戶口賑四箇月次貧者賑三箇月又次者賑兩箇月俱以本年二月爲止朕思三四月間正青黃不接之際在官倉雖有平糶之米而無力窮民仍苦糴買無資難以餬口良可軫念下江地方著將極貧之民加賑一箇月上江去歲歉收較下江爲甚著將被災五分以上之州縣加賑極貧次貧者一箇月被災四分以下之州縣加賑極貧者一箇月該部可卽行文該督撫預先籌辦米穀並飭有司實力奉行俾閭閻均沾

實惠欽此

乾隆三年松江下砂頭二三場被災經大學士浙督嵇曾筠報災散賑乾隆四年浙撫兼

管鹽政盧焯照民戶例一體分別加賑并應免緩徵錢糧題銷在案

乾隆十四年二月十三日奉

上諭據長蘆鹽政麗柱奏稱大軍凱旋辦理一切善後事

宜官兵糧餉等項在在需用其撥協軍餉之各省歲支俸餉亦所必需請照康熙十四年之例蘆東每引增銀五分并請勅令兩淮兩廣河東浙江等省一體按引增課等語此奏殊屬猥瑣鄙陋金川用兵供億固爲浩穰但國家當全盛之時無論已經降旨允降班師卽令尚

在進兵公帑所儲儘足敷數年之用不致拮据且康熙十四年增加鹽課原因開墾未久三孽煽動兵連數省正供缺乏不得已而爲之旋卽復舊今時勢懸殊豈可援以爲例至山西淮浙商民捐輸旣屬伊等感沐頻年蠲免恩膏願出餘資少裨饋運而按例議敘又蒙優典初非勒派科斂強以必從也其近日議復米豆稅額則全不爲軍興而然蓋自免稅之初卽有以利商而無益於民爲說者朕念切民依堅持不允乃行之數年米價不惟不減且視舊益昂無分豐歉踴如故則其果爲

無益殆可概見不若仍舊徵收以備賑恤優免之用朕
尚慮復稅後姦商乘機增價或致病民特旨詢問管理
關稅之人今據倭赫奏聞開徵一月有餘較前毫無增
減足驗米稅復額一事洵爲理勢之必當變通者朕辦
理庶務悉斟酌時宜一出於大公至正豈肯稍有假借
規小利而啟迎合之端而衆人不能體會轉以其私意
小見臆度觀望紛起言利豈朕而容聚斂之說得以行
於今時哉昨有唐綏祖倡捐養廉之奏朕已降旨申飭
今麗柱復以增課爲請是羣情之不顧大體競思懸擬

此風斷不可長若不加懲警將來效尤波靡習尚日益
澆漓閭閻不無驚擾麗柱著交部察議罷兵之舉斷自
朕衷卽此而觀非特民命國儲得以休養生息而於人
心風俗亦大有維繫囊弓偃革更何疑焉著傳諭中外
知之欽此

乾隆二十年五月十四日奉

上諭前尹繼善奏請明歲南巡預備一切事宜已降旨俟
西北兩路軍務告竣後頒發諭旨遵行此時有預備處
只當從容籌畫無事張皇今兩路征兵所至準噶爾諸

部望風投款接踵歸誠看來即日已可就緒省方問俗自屬應行之事江浙地境毗連所有應行預備事屬相等但俟降旨後始行籌備未免急遽著傳諭喀爾吉善或當先期飭備前經臨幸各處止須略加葺治以資頓宿備觀覽足矣上次過於繁費此番俱可不必紹興毋庸前往卽西湖中所需

皇太后及朕御舟各備一二隻其餘隨時各載小艇毋須多備船座以滋糜費其馬匹一項江省已令將現需馬匹開數具奏交軍機大臣代爲籌辦浙省需備馬幾何

不敷幾何亦將如何委員採買如何定價之處詳悉奏聞一并交令籌辦至一應費用若扣各屬官養廉及令衆商捐資皆斷不可行浙省商力尤非兩淮可比兩淮尚不准捐輸何況兩浙該督可行文普福於應解內務府開款內撥銀十萬兩預備浙省辦差之用諸事較前務加簡樸稱朕觀風省俗之意其或過於糜費務事華飾不惟不能邀朕嘉悅將轉致取咎矣該督酌量應於何時前赴浙省親爲料理先期奏聞將此詳悉傳諭知之欽此

乾隆二十年六月奉

上諭大學士陳世倌協辦大學士蔣溥等奏稱江浙士庶望幸情殷請於明歲再舉南巡一摺朕於乾隆十六年巡幸吳越迄今已越五載該督尹繼善喀爾吉善等均曾具摺奏請朕因西師尚未凱旋未經允准現在膚功迅奏荒服敕寧南省民風吏治時厯於懷而高堰隄工尤數郡生靈攸繫上年告竣以後正當親加察勘前降旨於明歲春月展謁孔林著允大學士等所請於禮成之後敬奉

聖母皇太后鑾輿順道前往江浙以抒勤民之隱而慰望幸之忱朕省方觀民八疆考績維期勤求實政宣達羣情一切供頓均出內府絲毫不以擾民地方官毋得指名儲備令衆商捐輸及扣各屬養廉察出定行嚴加究處前者巡幸南省時屢飭各督撫務從簡樸而所至尚覺過於華飾喧溷耳目此次行宮及名勝憩息之所悉仍舊觀但取灑埽潔除概毋增一椽一瓦毋陳設玩器城市經途毋張燈演劇踵事增華巡覽所及各督撫等果能綏輯井疆康乂烝庶俾人敦禮讓俗慶盈寧朕自

深爲嘉悅若其徒事華靡致飾觀美耗有用之財侈無益之費適以自滋罪戾甚無取焉各督撫及所屬官民人等尚其善體朕心以副朕觀民間俗行慶施惠之至意欽此

乾隆二十年七月初七日

上諭內閣朕時巡江浙已屢降旨令各該督撫等毋事浮靡務從簡樸並飭禁一切商捐陋習乃聞前次南巡時浙省辦差至有當商捐費者此斷不可著再行曉諭嚴加禁止朕清蹕所經觀民間俗關政治之大端卽動用

數十萬正帑亦何不可而必取給於捐項乎該督撫等
宜仰承德意撫恤黔黎毋徒以鋪張華麗喧溷耳目至
派累各商鋪戶使不肯胥役乘機滋擾侵肥是以惠民
之典而轉以累民豈朕巡幸本意亦豈所以慰兆庶望
幸之情耶若仍出此朕惟引以爲戒不當俯從所請矣
如西湖中船隻自

皇太后及朕御用一二舟外其隨侍人等原可各載小艇
毋庸多備船座以滋糜費再所過城市民居因迎候鑾
輿各出誠敬之意於其門前香燈懸綵者自可不禁其

行宮陳列玩器蘇揚城郭街衢間張設棚幔已有旨禁
飭至沿途水次從前俱設燈船戲船臺閣俚俗遊玩之
具此不過地方吏役及民間遊手好事之徒藉名科斂
尤當通行嚴禁該督撫等其凜遵毋忽欽此

乾隆二十二年三月初一日奉

上諭江浙二省積欠地丁銀兩前已有旨豁免而浙省所
免獨少足見黎庶素屬急公今巡省莅止因命悉查各
項則尚有乾隆十八十九二十等年各屬未完緩徵及
蠲剩漕項銀十八萬九千餘兩二十年分杭嘉湖紹四

府屬縣場未完借欠籽本銀三萬七千八百餘兩十八
二十年分各衛所未完屯餉銀六千四百餘兩並海寧
縣未完沙地公租銀二千餘兩著加恩概行豁免該督
撫等其董率屬員實力奉行毋令胥役里長侵蝕中飽
副朕曲體惠鮮之至意欽此

是年浙江巡撫兼理鹽政楊廷璋將原動鹽義倉米

價借給仁和場貧竈籽本未完銀兩題請豁免在案

乾隆二十四年二月二十八日奉

上諭楊廷璋奏稱兩浙商衆呈稱遠陲向化率土歸誠情
願公輸銀二十萬兩稍佐屯餉之需不敢仰邀議敘等

語兩浙商力素薄而踴躍急公情詞具見誠懇著允所
請將所捐銀兩令楊廷璋委員解赴甘肅交與總督吳
達善以備軍需賑恤之用該商等仍著交部議敘欽此

乾隆二十七年三月初七日奉

上諭前經降旨將江蘇安徽浙江積欠地丁概行豁免而
浙江一省積欠較少今翠華莅止體察民情宜再加恩
以示鼓勵著將浙省所有乾隆二十三、四、五、六等年災
緩帶徵未完地丁屯餉等銀五萬三千餘兩災緩未完
及二十五年以前民欠未完漕項銀十一萬餘兩並水

鄉竈課未完銀十萬一千餘兩通行蠲免俾閭閻得以均霑渥澤該部遵諭速行欽此

乾隆二十七年三月十一日奉

上諭此次南巡兩淮辦差商衆已降旨賞賚而浙商亦有承辦差務巡省所至宜一體加恩以敷慶澤著將嘉松寧紹等所運銷引鹽每引各加五斤以一年爲限俾民食足而商力紓稱朕恤商愛民至意欽此

乾隆二十七年四月十一日奉

上諭據高恆奏辦理掣獲私鹽車船變價充餉一摺船隻

既可裝運鹽斤斷無一船僅變價二三錢之理明係該
地方官一任書役估變不行稽查所致該鹽政已咨商
督撫將各該處掣獲船隻卽烙解交運司驗明原船之
堅固朽爛酌量辦理但各省皆有緝私之責車船變價
猶其小者如此相沿陋弊必因漫不經心私鹽充斥職
此之由著傳諭該督撫嚴飭所屬嗣後務宜實力掣獲
私販其車船務須詳驗明確從實估變如州縣官暨胥
役等或有變多報少與原獲車船轉售私梟等弊卽行
查明叅處高恒摺著鈔寄閱看可於直省督撫奏事之

便傳諭知之欽此

乾隆二十八年四月十一日奉

上諭工部議覆楊廷璋等奏銷南巡動用款項一本因該督等籠統開報未將應用各項詳細聲明駁令據實刪減現已明降諭旨加恩准其報銷矣此係出自朕之特恩不可視爲常例奏銷銀款原宜慎重例係前後動用各項暨物料尺寸細數逐一分晰造報該部方可據以察核若但籠統開銷何以信其並無浮冒且奏銷時既可籠統則動用時必不能加意撙節此在督撫大臣可

保其必無染指司道大員受恩簡用卽不致因辦理差務混冒肥橐而其往來食用或不免藉端取給至於承辦之佐雜等官藉此含糊弊混以爲冒銷之地更勢所必有若以從前尹繼善奏銷江南辦差銀兩旣降旨准銷今楊廷璋此本又得一例降旨將來遂致視爲故事並不按照成例詳晰造冊仍前籠統開銷以至不肖官吏得以從中取利一經察出則惟該督撫是問朕巡省所至凡行宮預備等項已屢經詳諭該督撫等一切務從簡樸從前三次辦理已不免踵事增華倘將來彼此

效尤日甚一日何所底止且如朕在京及圓明園每日
視事之所雖細如頂棚糊飾之類不過隨時粘補不求
一律鮮華此亦廷臣所共知若以偶然駐頓之地當上
屆已經整葺而小有滲剝不過略加補苴便已妥協何
必更增繁費前此地方官知朕絲毫不累及民動以商
捐藉口殊不知官取給於商而商人所捐孰非民用所
給自後該督撫惟應實力約省凡有所需用只須支取
例給之項及前此賞用所餘據實冊報查核其商捐一
節亦儘可停止又扈從官員並已給船乘載何須預備

公館在扈蹕大臣等朝夕侍直該班旣不能四出居停其各衙門官員差使稍緩者卽泊舟稍遠亦無難從容退食乃有司等輒以此爲名致不肖胥役保甲等佔貼民房勒索滋弊此風斷不可長亦著嚴飭禁止無得稍爲寬假或大臣官員等自需住宿則聽其出資僦賃不許地方官代爲購覓以杜擾累此後公館一事竟宜停止欽此

乾隆二十九年八月十三日奉

上諭熊學鵬奏嘉松二所本年產鹽不敷接濟請借撥閩

鹽運浙等語雖引舊例所見過於拘泥甚屬不諳事理
嘉松所與揚州地本接壤一水可通卽其配運蘇常一
帶之用協濟尤爲近便自應就近咨商江省督撫及兩
淮鹽政撥運接濟乃轉借撥閩鹽必由海道轉運種種
艱難其事殊不可解卽如奏中楊廷璋欲撥及臺灣餘
鹽而熊學鵬亦稱其不必如是亦知其路遠難濟也行
鹽各分地面原爲尋常配引而言若當閭閻淡食之時
舍近就遠膠柱鼓瑟若此乎在該撫不過以浙閩爲一
總督非江督所轄因而心存畛域又豈封疆大臣權宜

辦公之道著傳諭尹繼善莊有恭會同高恆於兩淮鹽斤內量其有餘就便協撥應用卽一面辦理一面奏聞以濟民食如閩鹽辦運已有先到者亦不妨量用少許餘卽取給兩淮倘尚無成局則竟行文停止將此詳悉傳諭該督等及熊學鵬知之原摺均鈔寄或實有不可行之處不必遵旨卽將實情奏聞欽此

乾隆三十年閏二月初三日奉

上諭朕巡幸江浙啟鑾之初降旨將江浙二省累年積欠錢糧全數豁免而浙省所免之數較之江省尚少茲當

入疆伊始疇咨民瘼該省尚有未完款項著再加恩將
浙江省乾隆二十六七八等年積欠未完漕項及仁和
袁浦等場未完竈課銀一萬八千六百餘兩二十四六
七八等年因災緩帶積欠未完南米及借給各場竈戶
倉米一萬八千九百餘石二十六八兩年錢塘諸暨玉
環等廳縣借給農民緩徵穀及因災緩徵租穀一萬六
千九百餘石概行蠲免該督撫等其率屬實力奉行務
俾恩膏下逮稱朕惠愛黎元至意該部遵諭速行欽此

乾隆三十五年三月二十一日奉

上諭兩浙商人聞朕允直隸臣民之請恭奉

皇太后安輿巡幸天津情殷愛戴籲懇巡撫熊學鵬代爲
陳奏攜衆赴津抒誠祝

嘏奏到時伊等業已在途情詞誠切茲蹕途所至見該商
等歡欣踴躍忱悃可嘉自應量加恩賚將每引額定鹽
斤外加鹽五斤免其輸納課項以一年爲滿俾商力益
臻饒裕該部卽遵諭行欽此

乾隆三十六年十一月三十日奉

上諭本年恭逢

皇太后八旬萬壽兩淮長蘆浙江等處商人來京恭辦
慶典踴躍可嘉業已優加賞賚並將淮商提引案內應繳
銀兩再行展限以示體恤更念該商等一體辦公而總
商甲商叨恩獨厚其餘商衆未能徧逮因傳旨詢問李
質穎等令就各處情形查明具奏今據奏覆所有兩淮
之梁鹽安鹽二種成本原自不同價值不應一例著將
淮商之梁鹽每斤增價二釐安鹽每斤減價二釐在物
價裒益旣以適均民商亦爲交便其長蘆商人應完三
十六年引課錢糧准分作三年帶徵以紓商力山東商

人每年應領額餘引五萬道准其停領三年其應完正雜課銀仍照舊輸納兩浙商人准每引加餘鹽五斤以三年爲限如此分別加恩庶總散各商得以同霑愷澤共沐

慈恩用廣推仁至意欽此

乾隆三十七年十月戶部議覆浙江巡撫熊學鵬奏請飭兩江總督飭松所地方各官緝私摺奉旨地方私鹽承緝不嚴官引必致壅滯在江省各屬文武員弁以所行乃浙省鹽斤未免意存歧視雖有緝私之

名不肯實力從事而浙江鹽政又以緝私官弁兵役皆隔省所轄呼應不靈松所鹽務之疲率由於此從前李衛以浙江總督兼令節制江南捕盜諸事是以緝私盡力鹽法暢銷然亦間有過當之處其後歷任巡撫兼管鹽政未嘗無考核緝私之責而令不能行之江省地方官往往陽奉陰違因循已非一日不知行鹽雖在隔境而鈔引同屬辦公司鑿者固不便因鹽務所在之區越俎干預他事其有關鹽政者原可隨時核計如果江省地方官視緝私爲具文不知畱心整頓以致梟徒充斥

膜視悞公卽當指叅一二予以應得處分各員弁等自不敢仍前玩忽干咎若僅如戶部所議專責江省大吏督查恐日久尚成故套於浙鹽仍無裨益嗣後松所緝私之事除交江省督撫董飭各該地方文武盡力嚴拏外倘有稍分畛域不肯實心緝私者並准浙江巡撫核實叅奏照例議處該上司等亦難辭督率不嚴之咎如此則江省有司旣無敢膜視卸肩而松所商人亦無由推託藉口方爲兩得餘依議欽此

乾隆三十八年九月二十四日戶部議覆浙江巡

撫三寶具題兩浙商人何永和等捐助川餉一疏
奉

旨何永和等雖稱公捐出自至誠不敢仰邀議敘第念其
踴躍急公情殷報効自應一體加恩著三寶卽查明各
商捐數多寡核定等差報部照例分別議敘餘依議欽
此

乾隆四十三年十一月十一日奉

上諭據王亶望奏浙江巡撫衙門額設養廉銀一萬兩諸
事已敷用度向因兼管鹽政於引費項下添有養廉銀

四千八百兩及掣鹽路費賞賚等項公費銀五千兩請一并裁減撥充海塘經費等語自應如此辦理已批交該部知道矣但歷任浙江巡撫因兼管鹽政養廉優厚每將金珠鑲嵌之如意陳設等項附貢進呈耗物力而適形其俗朕所不喜向來多不賞收今該撫既奏裁鹽政養廉等項更不必復爲此無益之費著傳諭該撫嗣後務須遵旨妥辦不得復以金珠鑲嵌器玩呈獻將此傳諭知之欽此

乾隆四十三年十二月初一日奉

上諭前經降旨允江浙所請於乾隆四十五年正月啟鑾
南巡因江蘇辦理差務不無經費已有旨令伊齡阿於
運庫內賞給銀三十萬兩以爲南巡差務之用矣第念
浙江水營行宮等事雖少於江蘇地面然一切差務亦
資需用自宜一體加恩著於鹽項銀內賞給十萬兩以
爲浙省辦差之用該督撫務須董率所屬妥協經理毋
得絲毫派累民間致滋紛擾以副朕孚惠於民至意該
部卽遵諭行欽此

乾隆四十四年七月二十三日奉

上諭據王亶望等奏請裁浙省商籍學額一摺雖應交部議但思浙省商籍與長蘆山東情形不同該省人文本盛應試人多本地之人藉商籍登進者十居七八其中人才輩出頗有用至大僚者是浙省商籍卽仁錢士子進身之一途朕所素知若一旦全行裁汰名爲嚴核商籍童生實則暗減杭城學額寒畯不免有向隅之歎況商籍之所以清釐者原因該省地方官或私令子弟至親冒名入籍以冀倖進實爲積弊不可不嚴查究治此後如實係冒濫者有犯必懲其餘則不必因噎廢食

申厲禁朕從不爲已甚之事何必獨於此加嚴以抑士氣乎且浙江商籍學額相沿已久向亦未聞其有弊竟可毋庸更張朕以爲浙江商籍學額竟可仍舊辦理但令該撫等隨時查察勿使有倖濫等弊足矣著九卿一并議奏以爲何如欽此

乾隆四十七年七月初八日奉

上諭四庫全書現在頭分已經告竣其二三四分限於六年內按期歲事並特建文淵文溯文源文津四閣以供藏庋因思江浙爲人文淵藪允宜廣布以光文治現特

發內帑銀兩雇覓書手再行繕寫三分分貯揚州大觀堂之文匯閣鎮江金山寺之文宗閣杭州聖因寺內今擬改建文瀾一閣以昭美備著傳諭陳輝祖伊齡阿盛住等所有大觀堂金山寺二處藏貯圖書集成處所其所空餘格甚多即可收貯四庫全書著書格不敷著伊齡阿再行添補至杭州聖因寺後之玉蘭堂著交陳輝祖盛佳改建文瀾閣并安設書格備用伊齡阿盛佳於文淵等閣書格式樣皆所素悉自能仿照妥辦至修建書格等項工費無多卽著兩淮浙江商人捐辦伊等情

桑梓於此等嘉惠藝林之事自必踴躍觀成歡欣從
事也將此各傳諭知之欽此

乾隆四十七年九月初二日奉

上諭據陳輝祖奏遵旨改建文瀾閣安設四庫全書一摺
內稱勘得玉蘭堂逼近山根地勢潮溼難以藏書擬於
玉蘭堂之東迤下藏書堂後堪以改建並稱據商總等
呈請改建等項及雇覓書手繕寫之費情願按數呈繳
等語玉蘭堂既據陳輝祖奏稱地勢潮溼難以藏書現
在盛佳奏請陞見且俟伊到京後詢明該處情形將文

淵閣式樣帶去再行辦理至商總等呈請捐項自辦該處改建文瀾閣出自伊等情殷桑梓踴躍輸忱尚可准行至雇覓書手繕寫現已飭動官帑辦理前據伊齡阿奏揚州商人請捐辦大觀堂金山寺二分繕書費用已於摺內批示不必令仍動官項所有浙商呈請公捐之處亦可不必將此傳諭陳輝祖並諭盛佳知之欽此

乾隆四十八年九月二十六日奉

上諭朕明歲南巡一切行營供頓俱預期頒發帑金交該督撫備辦從無絲毫擾累閭閻但恐各督撫不能仰體

朕意致滋糜費如現在盛京途次見有搭蓋買賣街席棚卽此一節亦屬多事隨從之官員人等其日用所需聽其自辦每歲木蘭行圍何嘗官爲預備並未缺少食物且添此席棚恐差竣後不肖屬吏冒濫開銷在所不免朕明春巡幸自直隸以至浙江著傳諭各該督撫不得隨營預備買賣街支搭席棚以滋無益之費至此次令阿哥等隨營者原令左右隨侍知朕年逾古稀未嘗少懈而扈蹕諸大臣亦皆恪恭敬事管束嚴明此令阿哥等觀看之意也該督撫等務須循照上數次之例辦

理差務行所無事總以節儉爲主不得因有阿哥隨行
稍爲添設預備再各省鹽政織造關差皆係內府世僕
知公主隨行係朕所鍾愛或進衣服食物以博朕歡殊
不思服食玩好宮中何物蔑有豈藉外間呈進著一并
傳諭飭禁伊等係內務府人員尚不許稍有進獻至督
撫爲封疆大吏又何得效尤及此耶著將此傳諭知之
欽此

乾隆四十九年三月奉

上諭前因江浙爲人文淵藪特降諭旨發給內帑繕寫四

庫全書三分於揚州文匯閣鎮江文宗閣杭州文瀾閣
各藏度一分原以嘉惠士林俾得就近鈔錄傳觀用光
文治第恐地方大吏過於珍護讀書稽古之士無由得
窺美富廣布流傳是千箱萬帙徒爲插架之供無裨觀
摩之實殊非朕崇文舉典傳示無窮之意將來全書繕
竣分貯三閣後如有願讀中祕書者許其陸續領出廣
爲傳寫祇須派委妥員董率其事設立收發檔案登注
明晰並曉諭借鈔士子加意珍惜毋致遺失污損俾藝
林多士均得殫見洽聞以副朕樂育人材稽古右文之

至意欽此

乾隆四十九年三月十二日奉

上諭據福崧奏兩浙商人何永和等欣逢翠華幸浙惠洽東南又於范公塘改建魚鱗石塘永資保衛該商等情願照依老鹽倉改建魚鱗塘捐數共捐輸銀六十萬兩以効下忱等語兩浙商人資藉官鹽營運獲息今因范公塘一律改建石工閭閻得資保護永慶安瀾伊等桑梓情殷輸忱報効甚屬可嘉自應俯從所請所有此項銀兩連前次陸續發交公項一并歸入海塘工程應用

工竣照例核銷該商人等並著加恩交部議敘該部知道摺并發欽此

乾隆五十二年十月十六日奉

旨吏部議覆琅玕題請以陸費鑒實授崇明鹽大使一本陸費鑒著該部於調補別省後卽准其實授向來鹽大使因無地方之責並不迴避本省是以陸費鑒籍隸浙江仍發浙江委用但思鹽場各員與州縣官專司民社者雖屬有間然鹽斤旣關係民食且所屬曬丁竈戶錢糧詞訟俱係該員經理究恐有徇私瞻顧等弊嗣後鹽

務各員銓選分發俱令迴避本省其現在各省鹽務各員有籍隸本省者著該部一體查明籤掣更調以示慎重官方之意著爲令欽此

乾隆五十三年正月十四日奉

上諭據琅玕奏兩浙商人何永和等呈稱臺灣逆匪剋日剿除商等志切同仇共深歡忭兩浙接壤閩省海濱寧靖引鹽得以暢銷願捐銀四十萬兩以爲賞恤兵丁之用等語該商等以浙閩境壤毘連逆匪蕩平引鹽得以暢銷念切輸將自應俯准所請以遂其報効之忱所有

商捐銀四十萬兩卽准其解閩備用至該商等踴躍捐輸殊屬急公著該撫查明咨部照例分別議敘以示獎勵該部知道摺并發欽此

乾隆五十五年八月十二日奉

上諭今歲朕八旬慶節率土臚歡現在來京祝嘏臣民俱已疊沛恩施同霑愷澤所有承辦慶典之浙江商人志切呼嵩亦宜一體加恩用昭嘉獎著將該商等本年應交柴塘生息銀十二萬兩於五十六年爲始分作三年帶完以示朕錫福施恩至意欽此

乾隆五十六年三月二十六日奉

上諭姚蔡奏粵浙兩省毘連江省之處堵緝私鹽尚易爲力惟建昌府屬界連閩省之區路徑較多堵緝稍難必須於各要隘添設卡巡廣爲堵截方收實效等語各省行銷官鹽分疆畫界各銷各地原以杜偷漏引課越境販私之弊但必須酌核地方遠近情形使民間食鹽不致舍近求遠去賤就貴方爲妥善卽如姚蔡所奏江西建昌界連閩省該處私鹽多從福建販入可見建昌一府雖例食淮鹽而距淮南二千餘里離閩省邵武汀州

等處不過二三百里運鹽程站較之淮南近至十倍其鹽價自必貴賤懸殊欲百姓之舍近賤而食遠貴原非正道卽禁閩販之不入江境顯屬有名無實不知從前定例時何以不將鄰閩府分就近行銷也他如湖南之永順湖北之宜昌等府與川境毘連該處私鹽俱從四川運入以此類推各省多有在鹽政等各有額定引課所謂出納之吝不肯通融辦理殊不知建昌與閩省相近永順宜昌等府與川省相近何妨改食川閩引鹽所有應徵鹽課卽移在該二省輸納如此一轉移間不特

便於民食卽私販亦無從影射獲利其弊自可不禁而止卽直隸豫東山陝甘肅江浙閩粵雲貴等省向定銷鹽地方有相離較遠之處或可改歸就近省分均勻搭配庶於民食國課兩無妨礙但此事行之旣久一涉更張恐致滋擾扞格難行著傳諭各督撫酌量情形悉心核議如能不動聲色與鄰省彼此確商調劑可省許多緝私之繁者並著會銜詳議具奏總以不畏難而又不滋事爲要將此各諭令知之欽此

嗣經浙江巡撫福崧以浙江鹽務悉照舊

定章程毋庸更議奏定在案

乾隆五十八年正月初六日奉

上諭浙江鹽務向係巡撫兼管遇有出納之事無人稽查巡撫得以任意動支易致滋弊嗣後應將杭州織造改爲鹽政兼管織造事務其鹽道本無分巡地方之責著改爲運使巡撫既不兼管鹽務則鹽政運使於錢糧出入如有侵挪等弊該撫卽可隨時糾察據實劾叅該省織造現改鹽政所有南北二關稅務難以兼顧著歸巡撫管理呼應較靈全德於此紫檳挪移課銀一事雖經叅奏但柴檳所挪銀兩訊係分作四次運往浙省已非一

日全德並不及早查叅若非該書吏陳浩稟知伊竟全無聞見亦難辭咎全德著降爲郎中職銜調補浙江鹽政兼管織造事務此時浙省鹽務正當清釐整飭另立章程全德接奉此旨馳赴杭州任事其兩淮鹽政著穆騰額調補穆騰額未到之先著奇豐額暫行兼署如奇豐額已回蘇州卽著速赴揚州兼管鹽政事務穆騰額接奉此旨亦不必來京請訓兩淮課額雖比長蘆較多而辦理鹺務事宜則一穆騰額卽先將天津鹽政事務交運使護理迅速前赴新任妥協經理毋負委任所有

長蘆鹽政著徵瑞補授徵瑞現署江寧織造其長蘆鹽政事務著巴寧阿速往接署徵瑞俟同德百日滿後前抵江寧卽行交卸織造事務速赴長蘆新任亦不必請訓至基厚之父西寧年逾九十基厚在外久缺定省著回京仍以內務府員外郎用俾得就近侍養以示體恤

欽此

乾隆五十八年二月初六日奉

上諭前據全德叅奏運使柴楨挪移商人鹽課二十二萬兩解送浙江彌補鹽道庫內短缺銀兩一案事關侵挪

帑項不得不切實嚴究特派慶桂會同長麟前往查審
彼時朕不但不疑福崧於此案有通同侵染情弊卽柴
楨由貴州舉人用至府道擢授運使該員以邊省寒畯
得此優厚俸廉已爲逾分亦不應再有敗檢營私之事
今據慶桂等審明福崧柴楨侵婪各款於原叅二十二
萬兩之外又審出福崧侵用掣規月費等銀六萬餘兩
殊爲駭異實出意料之外經慶桂等將福崧柴楨及案
內各員按律分別定擬具奏現經軍機大臣會同大學
士九卿核擬請照慶桂等所奏將柴楨擬斬卽於浙省

犯事地方正法福崧亦擬斬卽行正法均屬罪無可逭
柴楨著交長麟卽於浙省處決示衆至福崧初次在浙
江巡撫任內尚能循分供職嗣因失察知縣黃梅勒折
苛徵一案令其前往新疆辦事伊在彼三年自當愧悔
勉勵稍資歷練復加恩擢用巡撫又由江蘇調任浙江
冀收駕輕就熟之效福崧係碩色之孫伊家世受國恩
歷任封圻自應廉隅謹飭勉力圖報乃輒向鹽道婪索
多贓以致柴楨虧缺庫項營私骫法莫此爲甚此而不
嚴辦示懲何以肅官方而儆貪黷本應將福崧解京廷

三
讞如從前王直望國泰等嚴加刑訊俾封疆大吏知所
懲懼但朕年壽已高若親加訊問必生憤懣且福崧下
流不值朕動怒且慚也著毋庸解京卽令慶桂於押帶
福崧所到地方如在江南境內卽著會同書麟在該處
監視正法如已行抵山東卽會同吉慶在該處監視正
法亦足以爲封疆大員辜恩骫法者戒歸景照身爲藩
司大員本有奏事之責凡遇督撫有貪婪不職情事卽
應據實參奏乃於福崧種種貪劣各款並不據實劾參
轉代爲購辦金兩可見歸景照在藩司任內素屬無能

惟知取悅上司聽從指使以藩司大員似此逢迎交結
吏治更不可問卽置以重辟亦屬罪所應得今姑念歸
景照於此案尚無通同染指之處免其深究伊前於定
海縣嚴承夏自縊一案發往軍臺因屬公罪准其捐贖
今復有代巡撫購辦金兩之事自難再邀寬宥歸景照
著發往伊犁効力贖罪再不准捐贖至明保張愼和俱
係道府大員非丞倅佐雜可比於鹽道庫貯銀兩虧缺
稟明巡撫未經查辦卽應直揭部科乃扶同徇隱率行
接受交代結報無虧亦屬溺職明保張愼和均著革職

發往軍臺効力贖罪柴楨家人柏順代伊主餽送金兩
從中侵扣賊至逾貫卽與奴竊主財無異自應按律擬
絞卽在該處正法如已一并押解來京卽著慶桂等於
所到地方會同監視處決餘俱照所請辦理嗣後各督
撫等務當咸知儆省其矢潔清於地方事務實心整飭
毋致怠玩廢弛自罹重罪以副朕諄諄訓誡辟以止辟
至意毋似福崧欺朕毫而昏也將此通諭知之欽此

乾隆五十八年三月十三日奉

上諭原任杭州織造基厚回京侍養前來行在謝恩經朕

詢以福崧在浙江巡撫任內種種貪縱劣蹟伊近在同城豈得諉爲不知何以並不叅奏基厚惟有俯首認罪無可置辯各省鹽政織造關差等若以係屬欽差妄自尊大或干預地方事務則是自貽伊戚固當治罪至督撫等如有貪劣款跡一有見聞自應據實叅奏方爲不負委任卽如福崧在浙時派令柴楨購買物件侵用掣規月費賁檢營私又福崧之母游玩西湖派令鹽道預備食用燈綵船隻等項每次費銀數千兩劣蹟彰著而基厚身同尊曠不據實劾叅豈伊身爲織造惟知坐享

優厚養廉於督撫聲名款蹟全置不問耶基厚係內務
府郎中著降爲內務府筆帖式以示懲勸著通諭各省
鹽政織造關差所有地方事件固不得越職干預如遇
督撫等有貪黷營私及地方水旱偏災督撫有諱飾不
辦等事俱應隨時查察據實叅奏毋得如基厚之置若
罔聞并至如穆騰額之惟知派累商人封殖自肥致干
重譴該鹽政織造關差等務須共知儆戒遇事實心倘
有瞻顧徇隱及恃有此旨過甚滋擾等事一經察出必
將伊等從重治罪將此通諭知之欽此

乾隆五十九年五月初八日奉

旨戶部議駁兩浙鹽政全德奏浙商應輸閩餉等款銀兩請分限十年帶完一摺仍令各照原限完結固屬照例辦理但浙商資本微薄此項外輸銀兩若於正課之外責令一并交納恐商力轉輸不繼辦運未免多艱所有浙省商人應完閩餉藏餉外輸等款銀一百九十萬兩著加恩自甲寅年爲始分限五年完納清款以示格外體恤至意欽此

乾隆五十九年十月二十八日奉

上諭吉慶奏江蘇松江府太倉州屬竈地八月間雨水稍多收成歉薄等語松太等屬因積雨歉收前據奇豐額等奏到已降旨將應徵地丁漕糧概予緩徵今該府州所屬竈地亦應雨水稍多收成歉薄若將應徵鹽課一律徵收恐竈力不無拮据所有松江府屬之青村袁浦橫浦浦東下砂及下砂二三等六場並太倉州屬之崇明場各竈地暨府州所屬之華亭婁縣奉賢金山上海南匯青浦崇明等八縣低窪歉收田畝本年應徵鹽課錢糧亦著一并加恩緩至來年秋收後帶徵以紓民力

該部知道欽此

乾隆五十九年十二月初三日奉

上諭前因六十年乙卯元旦日食上元月食雖薄蝕躔度
可以預行推測所謂千歲日至可坐而致但稽古史傳
所載遇有日食月食等事往往下詔求言以示修省朕
思

上天垂象固宜戒愼而應天以實不以文與其託諸空言
孰若施諸實政前已降旨普免天下應徵漕糧俾海宇
子民共臻樂利今思各省尚有節年民欠及因災帶緩

未完銀穀俱應按限徵輸者在小民究因官欠未清未得遂其含哺之樂朕仰邀

昊眷在位六十年寰宇寧謐景運增隆丙辰年卽屆歸政今若於朕臨御之年覃敷恩賚俾小民節年欠項廓然一清得以戶慶盈寧共遊化宇所謂修德愛民孰大於是而修刑亦概於是矣以此上應

垂象感召休和實屬吉祥盛事所有各省節年正耗民欠及因災緩徵帶徵銀穀著各督撫詳晰查明按照該省所屬之某州某縣實欠在民銀穀若干速行開單具奏

到日降旨豁免並著先將此旨謄黃宣示俾鄉村鎮市咸使周知得以其沾實惠官吏胥役等無從影射侵冒以副朕子惠黎元敷錫延禧俾普天羣黎無一負欠者喜莫大於是該部卽遵諭行欽此

乾隆六十年二月十五日奉

上諭據全德奏山東各縣場積欠竈課及因災緩徵等銀共六萬九千二百九十二兩均係實欠在竈等語前經降旨普免天下積欠錢糧場竈積欠與民戶本無區別所有兩浙積欠竈課及因災緩徵共銀六萬九千二百

九十二兩並著一體加恩豁免以示朕一體同仁至意
欽此

乾隆六十年九月初五日奉

上諭舊例在京王大臣及督撫等每逢年節備物呈進酌
量賞收原以聯上下之情來歲丙辰屆朕歸政爲太上
皇若於年例之外添備一分呈進皇帝則伊等所得廉
俸或不敷辦公且恐外省督撫致有藉端私行派累之
事若祇備進一分伊等於心又有未安國家百年昇平
大內備貯陳設物件甚多原可無需再行呈進徒滋糜

費著自丙辰年爲始內外大臣所有年節三貢竟無庸
備物呈進惟元旦及朕與嗣皇帝壽辰慶節在朝王大
臣亦祇須備進如意以迓吉祥而伸惻忱逾日仍不過
分賜衆人也至各省土貢及鹽政織造關差年例備進
物件如果品茶葉之類係備頒賞之用應仍照向例次
數備進一分不得復有增添別物內外大臣職任部院
封圻惟當恪恭盡職勉思報稱原不在備物抒誠嗣後
務須仰體訓諭遵照辦理如有仍前備物瀆進者必當
交部議處將此通諭知之欽此

今上皇帝

嘉慶元年正月初二日奉

太上皇帝敕旨前降諭旨以丙辰年爲始內外大臣年節三貢毋庸備物呈進但王公大臣等年節呈進如意自雍正年間舉行至今以聯上下新年喜慶之意是以仍准呈進分賜以迓吉祥乃昨日貝勒貝子公等及部院侍郎散秩大臣副都統紛紛呈進如意兩分殊覺煩瑣不可不定以限制嗣後凡遇元旦及朕與皇帝壽辰慶節宗室親王郡王滿漢大學士尚書始准呈進如意其

餘概不准呈進至外省督撫止准按例呈進土貢其鹽政織造關差俱有得項所有年例辦進備賞之物俱仍照向例按次呈進一分以備賞用不得復有增添倘伊等私自備物瀆進一經查出必當重治其罪以節糜費而示體恤欽此

嘉慶四年正月十五日奉

上諭朕恭閱

皇考硃筆有嚴禁內外大臣呈進貢物

諭旨二道

聖訓煌煌

垂戒至爲明切夫貢之爲義始於禹貢原指任土作貢而言並非崇尚珍奇所謂不貴異物賤用物也我

皇考頒諭飭禁至再至三祇因和珅攬權納賄凡遇外省督撫呈進物件准遞與否必須先向和珅關白伊卽擅自准駁明示有權而督撫等所進貢物在

皇考不過賞收一二件其餘盡入和珅私宅是以我

皇考雖屢經禁止仍未杜絕試思外省備辦玉銅磁書畫插屏挂屏等件豈皆出自已資必下而取之州縣而

州縣必取之百姓稍不足數敲扑隨之以閭閻有限之脂膏供官吏無窮之腴削民何以堪況此等古玩饑不可食寒不可衣眞糞土之不若而以奇貨視之可乎國家百數十年來昇平昌阜財賦豐盈內府所存陳設物件充牣羅現在幾於無可收貯之處且所貢之物斷不能勝於大內所藏卽或較勝視之直如糞土也朕之所寶者惟在時和年豐民物康阜得賢才以分理庶政方爲國家至寶耳至應進土貢原爲日用所必需如吉林黑龍江將軍每年所進貂皮

東珠人參係該處所產之物其他如川廣之藥材九江之磁器江浙之綢緞及徽墨湖筆牋紙茶葉瓜果等項原不外任土作貢之義仍准按例呈進所有玉銅磁書畫挂屏插屏等物嗣後概不許呈進至在京王公大臣每年所進分例尚不能敷當差之用豈有餘資亦不許呈進貢物若內廷翰林所錄御製詩文冊頁及自作書畫等件尚可呈進斷不許增入古玩至各省鹽政織造關差等並無地方理事之責其應交盈餘銀兩現今戶部查明方擬酌減伊等辦公更

可裕如應進貢物准其照例呈進再年節王公大臣
督撫等所進如意取兆吉祥殊覺無謂諸臣以爲如
意而朕觀之轉不如意也亦著一并禁止經朕此次
嚴諭之後諸臣等有將所禁之物呈進者卽以違制
論決不稍貸特此明白宣示通諭中外知之欽此

嘉慶四年四月十六日奉

上諭蘇楞額奏兩浙商人吳康成等呈請公捐銀一百
五十萬兩以備凱旋賞需一摺該商等踴躍急公情
詞懇切自應俯如所請遂其報効之誠著加恩免交

銀五十萬兩准其交銀一百萬兩卽照所奏分作三年六次解交部庫仍將該商等交部照例議敘以示獎勵欽此

嘉慶四年七月二十五日奉

上諭各省進呈方物原以備賞賚之需現在二十七月之內萬壽慶節並不舉行筵宴無須頒賞所有各督撫及鹽政關差織造應進方物概行停止呈進若中秋節令外間不過以瓜餅食物酬酢往來內廷並無宴賚之例尤非萬壽及端陽歲除可比嗣後中秋節

貢永遠停止欽此

嘉慶四年十一月十九日奉

上諭現屆長至

園丘大祀

高宗純皇帝

升配禮成後自應仰推

皇考恩慈用敷惠罔因思乾隆六十年以前各省積欠緩徵地丁耗羨及民欠籽種口糧銀兩並積欠緩徵民借米穀草束等項現在應徵者尚復不少著該部通

金匱要略卷之五 雜考 四
行各省詳悉查明將以上各款自乾隆六十年以前
著行豁免俾寰宇羣黎同霑

遺澤於乾隆年間逋欠銀米等項永免追呼用仰副
皇考六十年子惠元元至意卽將此二條入於
升配恩詔款內欽此

嘉慶五年二月十八日奉

上諭延豐奏兩浙商人吳康成等呈稱川陝軍務指日
大功告竣良民復業一切賞賚撫綏需用較繁情願
再公捐銀一百萬兩以備賞賚之用等語兩浙商人

上年請捐銀一百五十萬兩當經酌收銀一百萬兩
給予議敘今該商等復行籲請捐輸餉項至爲懇切
著加恩將上年未收銀五十萬兩再行賞收卽照所
奏先於運庫內借支候撥分年歸款其餘五十萬兩
著不必交納欽此

嘉慶五年六月十八日奉

上諭延豐奏浙商吳康成等情切急公捐銀一百萬兩
以備凱旋賞賚並願捐銀十萬兩以備海洋緝匪公
費一摺浙江溫台等處地濱海隅皆係商人等刮漚

銷引之區現在添備兵船礮位於該處巡緝防守商人等捐銀十萬兩以濟公需自應准其所請著於運庫內墊解自本年秋撥爲始分作三年歸款至報捐軍需該商等業已兩次奏懇節經賞收銀共一百五十萬兩且此時帑藏充盈川陝連獲勝仗大功指日告蕲原無須續有捐項但該商等情詞懇切若不俯准所請轉無以遂其報効之誠著於所捐一百萬兩內賞收銀五十萬兩亦准於運庫內借墊解京自嘉慶六年春撥爲始分作三年歸款其未收銀兩賞還

該商等作爲運本自更臻寬裕朕爲恤商起見該鹽政不必再行瀆請其捐輸各商仍著加恩交部照例議敘以示獎勵欽此

嘉慶五年八月十六日奉

上諭延豐奏浙商吳康成等請捐穀石以濟偏災一摺該商等前因川省軍務指日蕲功公捐備賞銀一百萬兩經延豐據情代奏業降旨酌量賞收一半並將該商等交部議敘茲因台州等四府屬間被水災該商等誼切桑梓復請願捐穀十萬石以備賑需急公

尚義殊屬可嘉著再加恩交部議敘至此項穀石著照所請准其於省城溫郡兩處鹽義倉內借動碾運於一年內捐買還倉並著阮元督同藩司等將借動穀石妥爲賑濟務俾小民均霑實惠摺并發欽此

嘉慶六年四月初二日奉

上諭據延豐奏浙商吳康成等以大功卽日告蕝情願公捐銀一百萬兩預備賞賚之需呈請轉奏等語現在各路軍營連獲大捷敘匪卽日蕩平本無需該商等復行捐助惟念該商等踴躍急公情詞懇切著賞

收五十萬兩內三十萬兩著延豐卽行派員解交部
庫其餘二十萬兩著照所請准其分年完繳以紓商
力並著延豐造具該商等人數銀數履歷清冊咨部
給與議敘以示獎勵欽此

嘉慶六年八月初七日奉

上諭延豐奏浙江商人懇請公捐備賑銀兩一摺本年
京師雨水甚大永定河漫溢四處直隸被災州縣較
多節經朕發帑截漕諄飭該地方妥爲撫恤卽多費
銀米毫無靳惜原不待該商等捐款報効但旣據延

豐奏稱該商吳康成等情詞懇切踴躍輸將自應俯如所請所有該商等懇請公捐賑恤銀三十萬兩著加恩賞收准其在本年秋撥及冬令鹽課項下先行墊給派委妥員解交直隸備用於壬戌綱起分作五年歸款至該商等急公報効情殊可嘉著延豐查明此次商捐各姓名咨部議敘以示獎勵欽此

敕諭

敕浙江鹽政郎中兼佐領兼管織造事務延豐茲命爾巡視浙省鹽課兼管上供緞疋戶工二部官緞織造

事其鹽政事務察照戶部所定運司分司場竈官丁
亭戶照例統理該管各府州縣額引照舊督銷凡邊
商內商正課餘鹽引數目屬爾徵核該管衙門官吏
胥役嚴行約束鹽梟私販實力緝捕其負鹽易食貧
民不在禁例毋致滋弊擾害商民該衙門公費犒賞
等項概從節省裕國課之本源紓商竈之積困博採
利弊斟酌損益如應會督撫事件叅酌施行所屬官
員有怠玩溺職應爾完結者卽行完結應叅奏者卽
行叅奏其織造事務約束胥吏稽察匠役督率機戶

人等揀選絲料悉照頒發式樣顏色如法織造毋滋
弊混如機杼不敷移文該撫照例增補應用銀兩移
文藩庫動支歲例春秋二次解進緞疋每次三船外
不許攜帶商貨船隻嚴禁姦蠹投充機戶致有透支
壓欠等弊年終將出納數目報部核銷爾受茲委任
須守法潔躬釐姦剔弊裕商儲於鹽筴供染采於絲
紉錄事勸功效能熙績如或不職責有攸歸爾其慎
之故敕

敕兩浙江南都轉鹽運使司運使茲以兩浙鹽賦國計

攸關命爾爲鹽運使務要約束衙門官吏胥役俾恪
遵法紀無致作弊生事擾害商民鹽司本源旣正方
可表率僚屬爾宜招徠商人嚴察場竈戶丁徵核正
課正行引目及派銷鹽斤引明則例以示綏懷飭捕
役以緝私鹽省虛費以速徵納剔侵蝕以疏積壅察
照戶部議覆鹽政逐款舉行凡行鹽地方該管州縣
悉聽管理所屬各官如有貪污溺職縱役侵漁應審
問者先行審問應劾奏者呈報巡鹽御史劾奏敕中
開載未盡事宜有應斟酌損益裕課便商者呈報巡

鹽御史商確妥當具奏施行爾宜聽巡鹽御史及該
督撫考成舉劾爾受茲委任當持廉秉公釐姦剔弊
務使商竈輻輳國課充裕斯稱厥職如或貪黷乖張
積耗叢生病商虧課國法具在必不能貸爾其慎之
故敕

欽定重修兩浙鹽法志卷首終